

VENDIM
Nr. 943, datë 9.10.2013

**PËR PËRCAKTIMIN E FUSHËS SË PËRGJEGJËSISË SHTETËRORE TË MINISTRIT TË
SHTETIT PËR INOVACIONIN DHE ADMINISTRATËN PUBLIKE**

Në mbështetje të nenit 100 të Kushtetutës dhe të pikës 2 të nenit 5 të ligjit nr. 90/2012 “Për organizimin dhe funksionimin e administratës shtetërore”, me propozimin e Kryeministrit, Këshilli i Ministrave

VENDOSI:

I. Miratimin e misionit, të fushave të përgjegjësisë shtetërore të ministrit të Shtetit për Inovacionin dhe Administratën Publike, si dhe të kompetencave për realizimin e tyre, sipas përcaktimeve të këtij vendimi.

II. Ministri i Shtetit për Inovacionin dhe Administratën Publike, në përputhje me Kushtetutën dhe legjislacionin në fuqi në Republikën e Shqipërisë, ushtron me përgjegjësi të plotë veprimtarinë e tij në procese, që kanë të bëjnë veçanërisht me hartimin dhe bashkërendimin e punës për politikën në fushën e teknologjisë së informacionit e të komunikimit elektronik, infrastrukturën e informacionit gjeohapësinor, shërbimit postar, mediat audiovizive dhe në fushën e administratës publike.

III. Ministri i Shtetit për Inovacionin dhe Administratën Publike ushtron veprimtarinë në këto fusha përgjegjësie shtetërore në përputhje me legjislacionin përkatës:

1. Zhvillimin dhe bashkërendimin e politikave të legjislacionit, të programeve e të veprimtarive, sipas kompetencave të parashikuara nga ligjet specifike, në fushën e komunikimeve elektronike dhe postare, mediave audiovizive, si dhe të infrastrukturës kombëtare të informacionit gjeohapësinor.

2. Bashkërendimin e punës për hartimin e strategjisë së integruar të inovacionit dhe të teknologjisë së informacionit.

3. Drejtimin dhe bashkërendimin e punës për politikën në fushën e administratës publike, si dhe është përgjegjës për hartimin dhe bashkërendimin e politikave për reformimin dhe modernizimin e administratës publike.

IV. Ministri i Shtetit për Inovacionin dhe Administratën Publike ushtron funksione dhe veprimtari të tjera në përputhje me ligjin, si dhe kryen detyra të tjera të deleguara nga Kryeministri.

V. Ngarkohet ministri i Shtetit për Inovacionin dhe Administratën Publike për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama